

SOALAN NO: 18

PEMBERITAHUAN PERTANYAAN DEWAN RAKYAT

JAWAPAN OLEH YB DATUK SERI DR. S.SUBRAMANIAM

MENTERI KESIHATAN MALAYSIA

PERTANYAAN : LISAN

DARIPADA : YB DATUK MOHD IDRIS BIN JUSI

[BATU PAHAT]

TARIKH : 28 OKTOBER 2015

SOALAN :

YB Datuk Mohd Idris bin Jusi [Batu Pahat] minta MENTERI KESIHATAN menyatakan rancangan mempercepatkan penempatan graduan perubatan dalam latihan “housemanship” bagi mengatasi masalah penantian yang panjang yang menimbulkan rasa kecawa dan merugikan pelaburan tinggi dalam pendidikan perubatan.

Tuan Yang di-Pertua,

Kementerian Kesihatan Malaysia (KKM) melaksanakan langkah jangka pendek dan jangka panjang bagi mempercepatkan penempatan graduan perubatan bagi menjalani latihan “housemanship” (dengan izin) seperti berikut:

- Mengawal bilangan graduan perubatan supaya tempoh penantian pelantikan sebagai Pegawai Perubatan Siswazah (PPS) dapat dikurangkan, di mana Kerajaan telah melanjutkan moratorium bagi bidang perubatan untuk tempoh lima (5) tahun lagi sehingga 2021;
- Pengambilan Pegawai Perubatan Siswazah (PPS) dibuat secara kerap iaitu setiap dua (2) bulan; dan
- Menggunakan sistem *e-housemen* yang telah dilancarkan oleh YB Menteri Kesihatan pada 19 Disember 2014 dan mula digunakan pada bulan Mac 2015. Dengan penggunaan sistem ini, ia mempercepatkan tempoh masa graduan perubatan mendapat penempatan latihan siswazah dari empat (4) hingga ke enam (6) bulan kepada hanya dua (2) hingga empat (4) bulan selepas mendapat surat tawaran pelantikan daripada Suruhanjaya Perkhidmatan Awam. Selain mempercepatkan proses penempatan, sistem ini juga telus kerana pemilihan penempatan ditentukan sendiri oleh calon berdasarkan kekosongan jawatan.